

En memoria da

29.4.1977 nr 32

Giusep Lurenz Hitz-Deragisch, Sedrun/Gonda

(Corr.) Gliendisdis, ils 4 avrel 1977, havein nus accumpignau il Sep Lurenz, sco el vegneva numnaus, a siu davos ruaus. Memia baul, aschia vul ei parer a nus, eis el ius a casa. — La notg ei ida da rendiu per el avon che il di possi prender sia entschatta. Per in malsau denton, che s'entaupa incuntin cullas dolurs finalas d'ina malsogna che fuga e fora senza cal, munta quei ina perpetnada, pils pli tier ed oravontut per consorta ed affons ina tortura smisereivla, in stendiu panzar e sperar. E tuttina eisi iu spert.

Il defunct ei naschius a Rueras ils 20 da november 1908, sco tierz affonet da 14 fargliuns dils geniturs Gion Antoni Hitz-Paly. Ei ha segiramein tuccau al preziau defunct da segidar culla gronda famiglia, essend che ei era da lezzas uras pintgas entradas. Carschend si en quei ambient e vargai ils onns da scola, sa el lura denteren far igl emprendissadi sco taglia-crappa. Ed el arva lu sez in pign luvratori da taglia-crappa e tschenta-pegnas a Rueras. Denton, quei fuva per el memia pign e stretg. Per quei anflein nus el biars onns, specialmein igl atun ed unviern, lunsch sur ils confins da nossa vischnaunca ora cun las pegnas-scalegl da Tujetsch, enconusentas lunsch entuorn. La stad tuccava ei da puspei segidar a casa.

Ils 13 da matg, il meins da spir fluras 1943, marida il Sep Lurenz la giuvna Rosa Deragisch a Sedrun/Gonda, ina niaza dils missionaris pader Placi e Teodosi Deragisch a nus aunc bein enconusents. El secasescha en la casa da sia consorta. Quella han els allura plaunet acquistau e rugalau ed oz eisi ina biala e stupenta casa. La consorta daventa in buna e fideivla consorta duront tut quels biars onns da lur veta communabla. Tier ina viseta sin viadi da nozzas tier igl aug, pader Placi, ella claustra da caputschins a Mels, duessi il bien pader haver giu dubel plascher ch'els seigien maridai gest ils 13 dil meins. Ei vegn gie pretendiu che quei datum porti buca cletg. — Quei seigi bein flausas, e veramein, als dus novs nozzadurs ha quei di purtau cletg ella veta matrimoniala. Ed oz fuva el el contuorn da ses biadis e biadis. Quei era ina gronda legria ed in deletg per il Sep Lurenz. Sia famiglia era stada benedida cun 8 affons: sis buobas e dus buobs.



Il Sep Lurenz ha era luvrau sin l'Alp-sura (Calmot) cun il scribent da questas munglusas lingias. Leu eis el staus in dils emprems che ha saviu dar agid tier ina greva disgrazia da lavur igl onn 1950, persuerter sun jeu aunc oz fetg engrazieivels al defunct Sep Lurenz. Era tier l'enconuschenta firma da construcziun, Murer SA, a Sedrun, lavura el quasi vegn onns. El presta era cheu buna lavur per cumpleina cuntentientscha da siu patrun e fuva stimaus e beinvesius tier ses conlvrers. Era tier la firma Smart a Sedrun ha el luvrau. Bugen ni nuidis ha el stuiu serender el spital a Glion tier ina greva operaziun, dalla quala el ei mai propi revegnius sco s'auda. Ina nauscha e maligna malsogna, che ha sfraccu quella plonta.

Ti has ussa finiu tiu viadi terrester e sas spitgar sin la levada. Dieus dumbra buc ils onns. Tgei emportan a Niessegner trenta, sissonta ne otgonta onns dapli, ni pli pauc. Avon el peisan ils merets, ch'han valeta perpetna e buca mo terrestra. RIP

G.F.